



UNDANG-UNDANG NEGERI SELANGOR

Enakmen No. 3 tahun 2007

**ENAKMEN PERLADANGAN UNGGAS
(NEGERI SELANGOR) 2007**

Tarikh Persetujuan Diraja	20 Ogos 2007
Tarikh diterbitkan dalam <i>Warta</i> ...	30 Ogos 2007
Tarikh berkuat kuasa	13 September 2007 (Sel. P.U. 324/2007)

ENAKMEN PERLADANGAN UNGGAS
(NEGERI SELANGOR) 2007

SUSUNAN SEKSYEN

BAHAGIAN I

PERMULAAN

Seksyen

1. Tajuk ringkas dan permulaan kuat kuasa
2. Tafsiran

BAHAGIAN II

PENTADBIRAN

3. Pelantikan pegawai diberi kuasa
4. Pegawai diberi kuasa boleh memohon bantuan awam
5. Menyimpan dan menyelenggara daftar

BAHAGIAN III

PELESENAN

6. Keperluan untuk lesen
7. Permohonan untuk lesen
8. Kelulusan atau penolakan lesen
9. Perladangan unggas tanpa lesen ialah suatu kesalahan
10. Kesahan lesen
11. Pemegang lesen hendaklah mematuhi syarat lesen
12. Mempamerkan dan mengemukakan lesen
13. Penggantungan atau pembatalan lesen
14. Membaharui lesen
15. Lesen tidak boleh dipindahmilik, diserahkan, *dsb.*

BAHAGIAN IV

KESALAHAN-KESALAHAN

Seksyen

16. Kesalahan melepaskan sisa unggas atau kumbahan sisa sungga ke dalam sungai, anak sungai, *dsb.*
17. Kesalahan melepaskan atau mengeluarkan bau busuk atau tidak enak atau debu dari ladang
18. Kesalahan membenarkan kawasan pembiakan lalat, serangga atau makhluk perosak
19. Kesalahan menggunakan buat dilarang atau menyalahgunakan ubat
20. Pengakuan dan maklumat palsu
21. Halangan menyalahi undang-undang ialah suatu kesalahan

BAHAGIAN V

PENGUATKUASAAN DAN PENDAKWAAN

22. Pegawai pelesen, *dsb.* boleh memasuki ladang unggas dan menjalankan siasatan
23. Kuasa penyiasatan
24. Sanksi untuk mendakwa
25. Hal perkara kesalahan boleh disita dan dirampas

BAHAGIAN VI

PELBAGAI

26. Mahkamah boleh memerintah pelucuthakan
27. Penalti bagi kesalahan yang tidak diperuntukkan selainnya
28. Kesalahan oleh pertubuhan perbadanan
29. Ladang unggas yang dikecualikan
30. Pengarah boleh mengkompaun kesalahan
31. Pematuhan kepada undang-undang bertulis yang lain
32. Perlindungan pegawai awam dan Pihak Berkuasa Negeri
33. Pihak Berkuasa Negeri boleh membuat peraturan-peraturan

Seksyen

34. *Mens rea* tidak diperlukan bagi kesalahan
35. Penyerahan notis, perintah, dokumen, *dsb.*
36. Peruntukan peralihan
37. Pihak berkuasa Negeri boleh menetapkan syarat

JADUAL PERTAMA

JADUAL KEDUA

JADUAL KETIGA

SELANGOR

ENAKMEN No. 3 tahun 2007

BETA PERKENANKAN,

(MOHOR
KERAJAAN)SHARAFUDDIN IDRIS SHAH,
Sultan Selangor

20 Ogos 2007

Suatu Enakmen untuk melesen ladang unggas dan untuk mengawal dan mengawal selia perladangan unggas dan aktiviti berkaitan dengan perladangan unggas di Negeri Selangor dan untuk mengadakan peruntukan bagi perkara yang berkaitan dengannya.

[]

DIPERBUAT oleh Badan Perundangan Negeri Selangor seperti yang berikut:

BAHAGIAN I

PERMULAAN

Tajuk ringkas dan permulaan kuat kuasa

1. (1) Enakmen ini boleh dinamakan Enakmen Perladangan Unggas (Negeri Selangor) 2007.

(2) Enakmen ini mula berkuat kuasa pada tarikh yang ditetapkan oleh Duli Yang Maha Mulia Sultan melalui pemberitahuan dalam *Warta*.

Tafsiran

2. Dalam Enakmen ini, melainkan jika konteksnya menghendaki makna yang lain—

“aktiviti yang berkaitan penternakan unggas” ertinya pemprosesan unggas dan sisanya atau aktiviti yang berkaitan yang lain sebagaimana

ditentukan oleh Pengarah melalui perintah yang disiarkan dalam *Warta*;

“ditetapkan” ertinya ditetapkan oleh Enakmen ini atau oleh peraturan-peraturan yang dibuat di bawahnya;

“fi yang ditetapkan” ertinya fi yang ditetapkan dalam Jadual Kedua oleh ditetapkan oleh mana-mana peraturan atau perintah yang dibuat di bawahnya;

“karkas unggas” ertinya bangkai atau sebahagian daripada bangkai, mana-mana unggas yang mati disembelih atau dengan cara lain;

“ladang unggas” ertinya mana-mana tempat di mana perladangan unggas dijalankan termasuk tempat yang digunakan untuk menyimpan unggas, membiak atau menternak unggas atau menjalankan mana-mana aktiviti berkaitan penternakan unggas;

“lesen” ertinya lesen yang dikeluarkan di bawah Enakmen ini;

“loji” ertinya mana-mana tempat di mana pemprosesan unggas dijalankan;

“memproses unggas” termasuk —

- (a) menyembelih, membuang bulu, membuang tulang atau membuang isi perut unggas;
- (b) memotong unggas yang telah disembelih kepada bahagian-bahagian; dan
- (c) melakukan mana-mana perbuatan ke arah penyediaan bagi pengilangan dan mengeluarkan produk sampingan daging unggas, untuk dijual;

“Negeri” ertinya Negeri Selangor;

“ofal” termasuk usus, perut, jantung, hati, paru-paru, limpa, ginjal, hempedal, darah atau mana-mana bahagian dalaman lain unggas;

“pegawai diberi kuasa” ertinya mana-mana pegawai awam yang diberi kuasa secara bertulis oleh Pengarah di bawah subseksyen 3(1);

“pegawai pelesen” ertinya mana-mana pegawai diberi kuasa yang ditentukan oleh Pengarah di bawah subseksyen 3(3) dan termasuk Pengarah;

“pelan susun atur” berhubung dengan mana-mana ladang unggas, ertinya pelan susun atur yang dikemukakan kepada pegawai pelesen berserta dengan satu permohonan untuk mendapatkan lesen;

“pembiakan” termasuk—

- (a) penyimpanan unggas pembiak;
- (b) penternakan unggas pembiak;
- (c) pengeluaran telur tetasan; dan
- (d) pengeluaran anak unggas umur sehari;

“pemegang lesen” ertinya mana-mana orang yang kepadanya lesen telah dikeluarkan dan termasuk mana-mana orang yang menjaga, atau menjalankan kawalan terhadap, sesuatu ladang unggas atau aktiviti yang berkaitan dengan unggas;

“Pengarah” ertinya Pengarah Jabatan Perkhidmatan Haiwan Negeri Selangor;

“peraturan-peraturan” ertinya peraturan-peraturan yang dibuat di bawah seksyen 33;

“perladangan unggas” termasuk melakukan mana-mana satu atau lebih aktiviti yang berikut:

- (a) menternak unggas pedaging;
- (b) menternak unggas penelur;
- (c) menternak dan membiak unggas baka;
- (d) mengendalikan tempat penetasan; dan
- (e) menjalankan aktiviti yang berkaitan dengan unggas;

“Pihak Berkuasa Negeri” ertinya Pihak berkuasa Negeri Selangor;

“produk sampingan daging unggas” termasuk nuget, bebola daging dan produk seumpama yang lain tetapi tidak termasuk ofal dan sisa unggas;

“rumah kediaman” ertinya satu kelompok rumah tidak kurang daripada lima rumah yang berpenghuni, tidak termasuk rumah setinggian atau rumah yang disediakan dalam ladang unggas;

“sisa kumbahan unggas” ertinya mana-mana sisa kumbahan yang dilepaskan dari ladang unggas;

“sisa unggas” termasuklah—

- (a) tinja, ekskreta dan bulu;
- (b) sisa makanan, kulit telur dan telur tembelang;
- (c) habuk papan, reja papan dan bahan serap lain yang digunakan sebagai las atas lantai bangsal unggas; dan
- (d) bahagian unggas yang lazimnya tidak dimakan oleh manusia;

“tempat penetasan” ertinya mana-mana premis yang digunakan untuk tujuan pengeraman dan tetasan telur-telur bernas bagi menghasilkan anak unggas berumur sehari;

“unggas” termasuklah ayam, itik, angsa, ayam belanda, ayam mutiara, puyuh, merpati, burung unta dan burung emu daripada apa-apa jantina, umur, baka atau generasi dan burung lain yang ditentukan oleh pengarah melalui perintah yang disiarkan dalam *Warta*;

“unggas pembiak” ertinya mana-mana unggas jantan atau betina daripada berbagai umur dan generasi yang digunakan untuk mengeluarkan telur bernas dan anak unggas umur sehari;

“ubat” ertinya apa-apa bahan atau campuran yang digunakan secara dalaman atau luaran bagi maksud rawatan, profilaktik atau

penggalak pertumbuhan atau bagi maksud mengubahsuaikan fungsi fisiologi atau tingkah laku unggas.

BAHAGIAN II

PENTADBIRAN

Pelantikan pegawai diberi kuasa

3. (1) Bagi maksud Enakmen ini, Pengarah boleh melantik secara bertulis mana-mana pegawai awam sebagai seorang pegawai diberi kuasa.

(2) Seorang pegawai diberi kuasa hendaklah menunjukkan, apabila diminta, kuasa bertulis yang dikeluarkan kepadanya oleh Pengarah.

(3) Bagi maksud Enakmen ini, Pengarah boleh menentukan secara bertulis seorang pegawai diberi kuasa sebagai pegawai pelesen.

Pegawai diberi kuasa boleh memohon bantuan awam

4. (1) Seseorang pegawai diberi kuasa boleh, selepas memperkenalkan dirinya dengan munasabah, meminta bantuan daripada mana-mana orang awam dalam menjalankan fungsinya di bawah Enakmen ini.

(2) Mana-mana orang yang enggan memberikan bantuan apabila diminta untuk berbuat demikian oleh seorang pegawai diberi kuasa melakukan kesalahan.

Menyimpan dan menyelenggara daftar

5. (1) Pengarah hendaklah menyimpan dan menyelenggara atau menyebabkan disimpan dan disenggara suatu daftar ladang unggas yang dilesenkan di bawah Enakmen ini.

(2) Daftar tersebut hendaklah mengandungi butir-butir berikut:

- (a) nama dan butir-butir peribadi pemegang lesen;
- (b) jika ladang unggas itu didirikan di atas tanah bukan milik pemegang lesen, nama dan butir-butir peribadi tuan punya tanah berdaftar;
- (c) nama perdagangan atau perniagaan dan lokasi ladang unggas itu;
- (d) butir-butir lesen yang dikeluarkan berhubungan dengan ladang unggas itu; dan
- (e) apa-apa butiran atau maklumat lain sebagaimana difikirkan perlu oleh Pengarah bagi maksud Enakmen ini.

BAHAGIAN III

PELESENAN

Keperluan untuk lesen

6. (1) Tertakluk kepada subseksyen (3), tiada seorang pun boleh mengusahakan atau menjalankan perladangan unggas melainkan jika suatu lesen di bawah Enakmen ini telah dikeluarkan kepadanya.

(2) Walau apa jua pun yang berlawanan dalam Enakmen ini, setiap ladang unggas hendaklah mempunyai lesen yang berasingan.

(3) Subseksyen (1) hendaklah terpakai hanya bagi perladangan unggas dengan kapasiti ladang yang ditetapkan.

Permohonan untuk lesen

7. (1) Permohonan untuk mendapatkan lesen hendaklah dibuat kepada pegawai pelesen dengan menggunakan Borang A sebagaimana yang ditetapkan dalam Jadual Pertama.

(2) Permohonan di bawah subseksyen (1) hendaklah dikemukakan berserta dengan—

- (a) satu pelan susun atur tapak dan lokasi mengenai ladang unggas yang dicadang itu yang menunjukkan—
 - (i) sempadan ladang dan sempadan tanah di mana ladang itu akan diadakan;
 - (ii) dimensi dan reka bentuk bangunan ladang dan struktur ladang itu; dan
 - (iii) lokasi tempat yang menunjukkan jarak mengikut garisan lurus mana-mana rumah kediaman, sekolah, klinik atau tempat ibadat yang sedia ada semasa permohonan dibuat, yang berada dalam lingkungan minimum dua ratus meter dari mana-mana bangunan atau struktur yang akan digunakan bagi penternakan unggas di ladang yang dicadang itu;
- (b) suatu salinan yang diperakui sah hakmilik tanah di mana ladang unggas didirikan atau akan didirikan;
- (c) jika tanah tersebut tidak dipunyai oleh pemohon, suatu persetujuan bertulis daripada tuan punya berdaftar tanah; dan
- (d) satu salinan yang diperakui sah pendaftaran perniagaan atau perakuan pemerbadanan, mengikut mana-mana yang berkenaan.

(3) Subperenggan (2)(a)(iii) tidak terpakai bagi loji pemprosesan unggas atau loji menyembelih

(4) Bagi maksud subperenggan (2)(a)(iii), “rumah kediaman” tidak termasuk mana-mana rumah setinggan, rumah pekerja atau mana-mana premis lain yang akan dibina atau diadakan di dalam ladang unggas itu sebagai tempat tinggal pekerja.

(5) Fi yang ditetapkan dalam Jadual Kedua hendaklah dibayar apabila permohonan untuk lesen diluluskan oleh pegawai pelesen atau oleh Pihak Berkuasa Negeri atas rayuan.

Kelulusan atau penolakan lesen

8. (1) Pegawai pelesen boleh mengeluarkan lesen atas syarat-syarat yang difikirkannya patut bagi maksud Enakmen ini atau boleh enggan untuk mengeluarkan lesen.

(2) Pegawai lesen boleh enggan untuk mengeluarkan lesen jika dia berpuas hati—

- (a) bahawa ladang unggas itu mungkin boleh mendatangkan bahaya kesihatan kepada awam;
- (b) bahawa ladang unggas itu mungkin boleh memudaratkan harta benda orang awam;
- (e) bahawa ladang unggas itu mungkin boleh mendatangkan pencemaran alam sekitar, di kawasan di mana ladang di cadang didirikan; atau
- (d) permohonan tidak mematuhi seksyen 7.

(3) Keputusan pegawai pelesen untuk tidak mengeluarkan lesen boleh dirayu kepada Pihak berkuasa Negeri dan keputusan Pihak berkuasa Negeri adalah muktamad.

(4) Rayuan di bawah subseksyen (3) hendaklah dibuat melalui Pengarah dalam tempoh tiga puluh hari dari pemberitahuan keputusan itu dan Pengarah hendaklah mengemukakan rayuan itu kepada pihak berkuasa Negeri dengan segera.

(5) Jika Pihak berkuasa Negeri membenarkan rayuan itu, pegawai pelesen hendaklah, apabila dibayar fi yang ditetapkan, mengeluarkan lesen kepada pemohon—

- (a) mengikut syarat-syarat yang dikenakan oleh Pihak Berkuasa Negeri, jika ada; atau
- (b) dengan syarat yang difikirkan patut oleh pegawai pelesen bagi maksud Enakmen ini apabila Pihak Berkuasa Negeri tidak mengenakan sebarang syarat.

(6) Semasa memberi suatu lesen, pegawai pelesen boleh mengenakan syarat-syarat ke atas lesen sebagaimana yang difikirkan perlu.

Perladangan unggas tanpa lesen ialah suatu kesalahan

9. Mana-mana orang yang mengusahakan atau mengendalikan ladang unggas tanpa suatu lesen yang sah adalah melakukan suatu kesalahan dan apabila disabitkan boleh dikenakan denda tidak melebihi sepuluh ribu ringgit tetapi tidak kurang daripada lima ribu ringgit atau penjara untuk tempoh tidak melebihi dua tahun atau kedua-duanya.

Kesahan lesen

10. (1) Lesen, jika tidak dibatalkan terlebih awal, adalah sah untuk tempoh maksimum dua belas bulan dari tarikh ia dikeluarkan melainkan dinyatakan sebaliknya dalam lesen tersebut.

(2) Lesen hendaklah dalam Borang B sebagaimana ditetapkan dalam Jadual Ketiga.

Pemegang lesen hendaklah mematuhi syarat lesen

11. (1) Seseorang pemegang lesen hendaklah mematuhi syarat-syarat lesen itu sepanjang tempoh lesen itu berkuat kuasa.

(2) Seseorang pemegang lesen yang melanggar mana-mana syarat lesen adalah melakukan suatu kesalahan dan apabila disabitkan boleh dikenakan denda tidak melebihi lima ribu ringgit atau dipenjarakan untuk tempoh tidak melebihi enam bulan atau kedua-duanya; dan dalam hal kesalahan berterusan, boleh didenda lima ratus ringgit setiap hari kesalahan itu terus dilakukan.

(3) Sebagai tambahan dan tanpa prejudis kepada subseksyen (2), mana-mana pemegang lesen yang didapati bersalah di bawah subseksyen (2) boleh dibatalkan lesennya atas budi bicara Pengarah.

Mempamerkan dan mengemukakan lesen

12. (1) Seseorang pemegang lesen hendaklah mempamerkan lesen yang sah di suatu tempat yang mudah dilihat di dalam ladang unggas yang berhubungan dengannya lesen itu dikeluarkan.

(2) Seseorang pemegang lesen hendaklah mengemukakan apabila diminta oleh Pengarah, pegawai pelesen atau pegawai diberi kuasa, lesen yang sah yang dikeluarkan kepadanya untuk pemeriksaan.

(3) Mana-mana orang yang tanpa sebab munasabah gagal mempamerkan atau mengemukakan lesen yang sah seperti yang dikehendaki oleh seksyen ini adalah melakukan suatu kesalahan dan apabila disabitkan, boleh dikenakan denda tidak melebihi satu ribu ringgit.

Penggantungan atau pembatalan lesen

13. (1) Pengarah boleh menggantung sesuatu lesen jika dia berpuas hati dan mempunyai sebab yang munasabah untuk mempercayai bahawa mana-mana unggas, karkas unggas, sisa unggas atau produk sampingan daging unggas daripada sesuatu ladang unggas boleh mendatangkan bahaya kepada kesihatan awam.

(2) Jika lesen sesuatu ladang unggas telah digantung di bawah subseksyen (1), Pengarah boleh mengeluarkan perintah—

(a) melarang mana-mana unggas, karkas unggas, sisa unggas atau produk sampingan daging unggas daripada dibawa keluar dari ladang itu dan perintah itu boleh berkuat kuasa sehingga pemeriksaan atau keputusan dibuat; atau

(b) melupuskan unggas, karkas unggas, sisa unggas atau produk sampingan daging unggas mengikut cara yang dia berpuas hati tidak akan menimbulkan apa-apa bahaya kepada kesihatan awam.

(3) Mana-mana orang yang tidak mematuhi perintah di bawah subseksyen (2) melakukan suatu kesalahan dan apabila disabitkan

boleh didenda tidak melebihi sepuluh ribu ringgit atau dipenjarakan selama tempoh tidak melebihi satu tahun atau kedua-duanya.

(4) Pengarah boleh membatalkan sesuatu lesen—

- (a) jika dia mendapati bahawa, selepas pemberian lesen itu, pemegang lesen telah memberikan maklumat palsu atau membuat pengakuan palsu pada masa permohonan dibuat di bawah seksyen 7 atau seksyen 36;
- (b) jika dia berpuas hati bahawa pemegang lesen telah secara berulang kali atau berterusan melakukan suatu kesalahan di bawah Enakmen ini atau di bawah peraturan-peraturan atau melanggar syarat-syarat lesen; atau
- (c) jika pemegang lesen didapati bersalah dan disabitkan atas mana-mana kesalahan di bawah Enakmen ini atau di bawah peraturan-peraturan.

Membarui lesen

14. (1) Permohonan untuk memperbaharui lesen hendaklah dikemukakan kepada pegawai pelesen dalam tempoh tidak kurang dari tiga bulan sebelum tarikh luput lesen semasa dan peruntukan subseksyen 7(1) hendaklah terpakai kepada semua permohonan pembaharuan lesen seolah-olah ia adalah permohonan lesen baru di bawah Enakmen ini.

(2) Mana-mana permohonan untuk memperbaharui lesen yang dikemukakan dalam tempoh kurang daripada tiga bulan tetapi sebelum tamat tarikh luput lesen semasa hanya akan dilayan oleh pegawai pelesen selepas suatu penalti, yang tidak melebihi satu ratus ringgit sebagaimana yang ditentukan oleh pegawai pelesen telah dibayar.

(3) Pegawai pelesen tidak boleh memperbaharui lesen di bawah Enakmen ini dalam keadaan berikut—

- (a) jika hal keadaan di mana subseksyen 8(2) terpakai;
- (b) jika pemegang lesen telah berulang kali atau berterusan melakukan kesalahan di bawah Enakmen ini atau di bawah peraturan-peraturan atau melanggar syarat-syarat lesen; atau

(c) jika pemegang lesen didapati bersalah dan disabitkan atas suatu kesalahan di bawah Enakmen ini atau di bawah peraturan-peraturan.

(4) Jika permohonan untuk memperbaharui lesen dibuat selepas tarikh tamat lesen semasa, pegawai pelesen boleh menimbangkan permohonan tersebut tertakluk kepada pemohon membayar penalti satu ribu ringgit bagi permohonan lewat.

(5) Keputusan pegawai pelesen untuk tidak memperbaharui lesen boleh dirayu kepada Pihak Berkuasa Negeri dan keputusan Pihak Berkuasa Negeri adalah muktamad.

(6) Rayuan di bawah subseksyen (5) hendaklah dibuat melalui Pengarah dalam tempoh tiga puluh hari dari pemberitahuan keputusan itu dan Pengarah hendaklah mengemukakan rayuan itu kepada Pihak Berkuasa Negeri dengan segera.

(7) Subseksyen 8(5) hendaklah terpakai jika Pihak Berkuasa Negeri membenarkan rayuan itu.

Lesen tidak boleh dipindahmilik, diserahkan, dsb.

15. Sesuatu lesen tidak boleh dipindahmilikkan, diserahkan atau diuruskan selainnya melainkan jika kebenaran bertulis Pengarah telah diperoleh terlebih dahulu dan penerima yang dipindah milik atau penerima serah hak atau mana-mana orang lain yang mengambil alih lesen itu adalah tertakluk kepada syarat-syarat yang sama pada lesen itu dan peruntukan dalam Enakmen ini seolah-olah dia adalah pemegang lesen asal.

BAHAGIAN IV

KESALAHAN-KESALAHAN

Kesalahan melepaskan sisa unggas atau kumbahan sisa unggas ke dalam sungai, anak sungai, dsb.

16. (1) Adalah menjadi suatu kesalahan bagi pemegang lesen, sama ada dengan sengaja atau tidak sengaja—

(a) membuang mana-mana karkas unggas, ofal atau sisa unggas;

- (b) melepaskan kumbahan sisa unggas yang tidak dirawat; atau
- (c) melepaskan kumbahan sisa unggas yang dirawat tetapi tidak mematuhi standard yang dinyatakan dalam peraturan-peraturan, ke dalam mana-mana sungai, anak sungai, parit, air darat, saluran pengairan atau mana-mana tempat yang tidak diwartakan sebagai kawasan pembuangan sisa.

(2) Seseorang pemegang lesen disifatkan telah membuang kaskas unggas, ofal, sisa unggas atau melepaskan kumbahan sisa unggas ke dalam sungai, parit, air darat, saluran pengairan atau mana-mana tempat yang tidak diwartakan sebagai kawasan pembuangan sisa jika dia gagal mengambil apa-apa langkah pencegahan untuk mencegah pembuangan atau pelepasan itu.

(3) Mana-mana pemegang lesen yang melanggar subseksyen (1) adalah melakukan suatu kesalahan dan apabila disabitkan boleh dikenakan denda tidak melebihi sepuluh ribu ringgit atau dipenjarakan tidak melebihi satu tahun atau kedua-duanya.

Kesalahan melepaskan atau mengeluarkan bau busuk atau tidak enak atau debu dari ladang

17. (1) Seseorang pemegang lesen hendaklah mengambil apa-apa langkah untuk mencegah—

- (a) pelepasan atau pengeluaran bau atau wasap yang tidak enak atau busuk dari ladang unggasnya; atau
- (b) pelepasan atau pengeluaran debu dari ladang unggasnya, yang mungkin menyebabkan kacau ganggu atau bahaya kepada kesihatan awam atau kemudaratannya kepada harta awam.

(2) Jika Pengarah menerima apa-apa aduan daripada mana-mana orang bahawa sesuatu ladang unggas melepaskan atau mengeluarkan bau, wasap atau debu yang tidak enak, busuk atau mungkin menyebabkan kacau ganggu atau bahaya kepada kesihatan awam atau kemudaratannya kepada harta awam, Pengarah hendaklah menyebabkan suatu siasatan dibuat mengenai aduan tersebut.

(3) Jika, setelah selesai penyiasatan itu, Pengarah berpuas hati bahawa aduan itu munasabah, Pengarah hendaklah menyebabkan suatu notis tunjuk sebab dihantar kepada pemegang lesen bagi ladang unggas yang berkenaan untuk menunjukkan sebab tentang kenapa lesennya tidak patut dibatalkan dan ladang unggasnya tidak patut ditutup.

(4) Jika pemegang lesen tidak menjawab notis tunjuk sebab itu dalam tempoh tiga puluh hari dari tarikh notis tersebut, Pengarah boleh membatalkan lesen itu.

(5) Walau bagaimanapun, jika pemegang lesen menjawab notis tunjuk sebab itu dalam tempoh tiga puluh hari yang dikehendaki di bawah subseksyen (4), Pengarah hendaklah menimbangkan jawapan itu dan boleh mengambil tindakan yang berikut:

- (a) jika dia berpuas hati bahawa keadaan itu boleh diperbaiki, dia hendaklah menghantar notis kepada pemegang lesen memintanya mengambil langkah-langkah untuk memperbaiki keadaan dalam tempoh seperti yang ditentukan oleh Pengarah di dalam notis itu dan Pengarah boleh juga menentukan, jika perlu, langkah-langkah pembaikan yang perlu diambil; atau
- (b) jika Pengarah berpuas hati bahawa keadaan itu tidak dapat diperbaiki, Pengarah hendaklah mengarahkan pembatalan lesen itu dan penutupan ladang unggas itu.

(6) Jika Pengarah bertindak di bawah perenggan 5(a) dan pemegang lesen tidak mengambil langkah-langkah pembaikan sebagaimana yang diarahkan, Pengarah boleh membatalkan lesen itu tanpa apa-apa notis selanjutnya kepada pemegang lesen.

(7) Jika Pengarah bertindak di bawah perenggan 5(b), dia hendaklah menyerahkan atau menyebabkan supaya diserahkan arahan pembatalan itu kepada pemegang lesen dan arahan pembatalan itu hendaklah menyatakan tempoh yang dalamnya ladang unggas itu hendaklah ditutup; dengan syarat bahawa tempoh itu tidak kurang daripada enam bulan dari tarikh penyerahan arahan itu kepada pemegang lesen.

(8) Mana-mana orang yang gagal mematuhi mana-mana arahan di bawah subseksyen (7) melakukan suatu kesalahan.

Kesalahan membenarkan kawasan pembiakan lalat, serangga atau makhluk perosak

18. (1) Seorang pemegang lesen hendaklah menjaga dan menyelenggara kebersihan am ladang unggasnya pada setiap masa dan hendaklah mengambil langkah-langkah untuk mencegah apa-apa keadaan yang menggalakkan pembiakan lalat, serangga atau makhluk perosak yang boleh menjadi punca kemudaratan kesihatan atau kacau ganggu awam.

(2) Mana-mana pemegang lesen yang, dengan sengaja atau tidak sengaja, membenarkan atau menyebabkan dibenarkan ladang unggasnya berada dalam keadaan tersebut yang melanggar subseksyen (1) melakukan suatu kesalahan dan apabila disabitkan boleh didenda tidak melebihi sepuluh ribu ringgit atau dipenjarakan selama tempoh tidak melebihi satu tahun atau kedua-duanya.

(3) Jika Pengarah menerima apa-apa aduan daripada mana-mana orang bahawa ladang unggas itu berada dalam keadaan yang menggalakkan pembiakan lalat, serangga atau makhluk perosak yang boleh menjadi punca kemudaratan kesihatan atau kacau ganggu awam, Pengarah boleh menyebabkan suatu siasatan dibuat mengenai aduan itu.

(4) Peruntukan subseksyen 17(3) – (8) hendaklah terpakai *mutatis mutandis* bagi seksyen ini.

Kesalahan menggunakan ubat dilarang atau menyalahgunakan ubat

19. (1) Seseorang pemegang lesen hendaklah mengambil apa-apa langkah untuk mencegah ladang unggasnya—

(a) menggunakan apa-apa ubat yang dilarang oleh pihak berkuasa; atau

(b) menggunakan apa-apa ubat dengan cara yang boleh mendatangkan bahaya kepada kesihatan awam, sebagaimana yang dinyatakan di bawah Akta Racun 1952 [*Akta 366*] dan Akta Makanan 1983 [*Akta 281*] atau perundangan subsidiari yang dibuat di bawahnya.

(2) Mana-mana pemegang lesen yang, dengan sengaja atau tidak sengaja, membenarkan atau menyebabkan dibenarkan ladang unggasnya berada dalam keadaan yang melanggar subseksyen (1) melakukan suatu kesalahan.

(3) Pengarah, jika atas pemeriksaan, berpuas hati bahawa pemegang lesen telah melanggar seksyen ini, hendaklah mengambil tindakan di bawah subseksyen 13(1).

Pengakuan dan maklumat palsu

20. Mana-mana orang—

(a) memberi maklumat—

(i) yang palsu; atau

(ii) yang dipercayai adalah palsu atau tidak benar; atau

(b) membuat apa-apa pengakuan palsu bagi maksud mana-mana permohonan, atau semasa menjawab apa-apa pertanyaan daripada Pengarah, pegawai pelesen atau pegawai diberi kuasa bagi apa-apa maklumat di bawah Enakmen ini,

melakukan suatu kesalahan.

Halangan menyalahi undang-undang ialah suatu kesalahan

21. (1) Mana-mana orang yang tanpa alasan yang sah menghalang atau menyekat atau membantu dalam menghalang atau menyekat seseorang pegawai pelesen, pegawai diberi kuasa atau pegawai polis dalam perjalanan atau pelaksanaan sah mana-mana kuasa atau tugasnya di bawah Enakmen ini; atau

(2) Menghalang orang lain daripada memberi bantuan atau kerjasama kepada seseorang pegawai pelesen, pegawai diberi kuasa atau pegawai polis dalam perjalanan tugasnya di bawah Enakmen ini,

adalah melakukan suatu kesalahan.

BAHAGIAN V

PENGUATKUASAAN DAN PENDAKWAAN

Pegawai pelesen, *dsb.*, boleh memasuki ladang unggas dan menjalankan siasatan

22. (1) Bagi maksud Enakmen ini, pegawai pelesen atau pegawai diberi kuasa boleh, pada bila-bila masa, memasuki dan melakukan pemeriksaan terhadap mana-mana ladang unggas jika dia mempunyai sebab yang munasabah untuk mempercayai bahawa suatu kesalahan telah dilakukan di bawah Enakmen ini dan menjalankan perkara yang berikut—

- (a) mengambil apa-apa sampel, ubat dan gambar, yang difikirkannya perlu;
- (b) memeriksa mana-mana buku, rekod dan dokumen yang dijumpai di ladang unggas itu atau mana-mana premis yang terdapat di dalamnya dan membuat salinan buku, rekod atau dokumen yang diperiksa; atau
- (c) merekodkan apa-apa maklumat mengenai mana-mana penyiasatan dan pemeriksaan untuk membuktikan bahawa suatu kesalahan telah dilakukan di bawah Enakmen ini.

(2) Dalam menjalankan kuasanya di bawah subseksyen (1), pegawai pelesen atau pegawai diberi kuasa boleh memasuki mana-mana premis yang terdapat di dalam ladang unggas itu, dengan atau tanpa kebenaran tuan punyanya.

Kuasa penyiataan

23. (1) Seseorang pegawai pelesen atau pegawai diberi kuasa hendaklah mempunyai kuasa untuk menyiasat perlakuan sesuatu kesalahan di bawah Enakmen ini atau di bawah peraturan-peraturan.

(2) Seseorang pegawai pelesen atau pegawai diberi kuasa boleh, berhubung dengan mana-mana penyiataan berkenaan dengan sesuatu kesalahan yang dilakukan di bawah Enakmen ini atau di bawah peraturan-peraturan, menjalankan kuasa-kuasa khas berhubung dengan penyiataan polis kecuali bahawa kuasa untuk menangkap tanpa waran yang diberikan oleh Kanun Tatacara Jenayah bagi kesalahan boleh ditangkap tidak boleh dijalankan olehnya.

Sanksi untuk mendakwa

24. Tiada apa-apa pendakwaan boleh dimulakan bagi apa-apa kesalahan di bawah seksyen 20 dan 21 terlebih dahulu mendapat persetujuan bertulis daripada Pendakwaraya.

Hal perkara kesalahan boleh disita dan dirampas

25. (1) Pegawai-Pelesen atau pegawai diberi kuasa boleh memasuki mana-mana ladang unggas jika dia mendapati—

(a) bahawa ladang unggas itu tidak mempunyai lesen; atau

(b) bahawa mana-mana orang, berhubung dengan ladang unggas itu, telah disampaikan arahan di bawah subseksyen 17(7) atau yang diberi arahan di bawah subseksyen 36(7), telah tidak mematuhi arahan tersebut,

dan—

(A) boleh menyita dan merampas semua unggas, karkas unggas, sisa unggas dan produk sampingan daging unggas; dan

(B) boleh merobohkan dan mengalih semua atau sebahagian struktur dan bangunan ladang,

yang didapati di atas ladang itu.

(2) Semua unggas, karkas unggas, sisa unggas dan produk sampingan daging unggas yang disita menurut subseksyen (1) hendaklah dilupuskan dengan lelongan awam dan cara lain sebagaimana yang difikirkan perlu oleh pegawai pelesen atau pegawai diberi kuasa dan hasil dari jualan itu hendaklah digunakan untuk menanggung segala perbelanjaan yang dilakukan dalam penyitaan dan perobohan dan pengalihan struktur dan mana-mana bangunan di ladang unggas itu dan apa-apa lebihannya hendaklah dikembalikan kepada tuan punya dan jika tuan punya tidak dapat ditentukan hendaklah dirujuk kepada mahkamah untuk mendapatkan perintah tentang pelupusan lebihan itu; dan mahkamah boleh, jika berpuas hati bahawa tuan punya itu tidak dapat ditentukan, membuat perintah supaya lebihan itu dikreditkan ke dalam hasil Kerajaan.

BAHAGIAN VI

PELBAGAI

Mahkamah boleh memerintah pelucuthakan

26. Mahkamah yang mensabitkan mana-mana orang dengan sesuatu kesalahan di bawah Enakmen ini atau peraturan-peraturan boleh, sebagai tambahan kepada apa-apa perintah yang dibuatnya, memerintahkan supaya dilucuthakkan mana-mana unggas, karkas unggas, sisa unggas atau produk sampingan daging unggas yang berkenaan dengannya kesalahan itu dilakukan.

Penalti bagi kesalahan yang tidak diperuntukkan selainnya

27. Mana-mana orang, selain sesuatu pertubuhan perbadanan, termasuk mana-mana Pengarah atau pegawainya, yang melakukan kesalahan di bawah Enakmen ini yang mengenainya tiada penalti diperuntukkan dengan nyata boleh, didenda tidak melebihi sepuluh ribu ringgit atau dipenjarakan selama tempoh tidak melebihi satu

tahun atau kedua-duanya; dan bagi kesalahan kali kedua atau kesalahan seterusnya didenda tidak melebihi lima belas ribu ringgit atau dipenjarakan selama tempoh tidak melebihi tiga tahun atau kedua-duanya.

Kesalahan oleh pertubuhan perbadanan

28. (1) Jika mana-mana orang yang melakukan kesalahan di bawah Enakmen ini ialah suatu pertubuhan perbadanan, ia boleh, apabila disabitkan, didenda tidak melebihi dua puluh ribu ringgit dan bagi kesalahan kali kedua atau kesalahan seterusnya, didenda tidak melebihi lima puluh ribu ringgit.

(2) Jika kesalahan yang dilakukan oleh sesuatu pertubuhan perbadanan dibuktikan telah dilakukan dengan keizinan atau pembiaran atau boleh dikaitkan dengan apa-apa kelalaian atau selainnya atas pihak mana-mana pengarah, pengurus, setiausaha atau pegawai serupa itu yang lain bagi pertubuhan perbadanan itu atau mana-mana orang yang berupa bertindak atas sifat sedemikian, mengikut mana-mana yang berkenaan, pengarah, pengurus, setiausaha, pegawai atau orang itu melakukan suatu kesalahan dan boleh dihukum di bawah seksyen 27.

(3) Jika seseorang ejen atau pekhidmatan sesuatu pertubuhan perbadanan melakukan suatu kesalahan atau melakukan sesuatu atau meninggalkan dengan melakukan sesuatu (yang jika dilakukan atau ditinggalkan daripada dilakukan oleh pertubuhan perbadanan itu menjadi suatu kesalahan di bawah Enakmen ini), pertubuhan perbadanan itu hendaklah, walau pun ia tidak tahu mengenai kesalahan itu, disifatkan telah melakukan kesalahan itu dan boleh, apabila disabitkan, dikenakan hukuman yang ditetapkan bagi kesalahan itu melainkan ia membuktikan bahawa—

- (a) perbuatan atau peninggalan yang diadakan bukan dalam ruang lingkup biasa pekerjaan ejen atau pekhidmat itu; atau
- (b) perbuatan atau peninggalan yang diadakan itu telah dibuat atau dilakukan tanpa kebenarannya atau pembiarannya dan bahawa dia telah mengambil segala langkah berjaga-jaga yang munasabah untuk mengelakkan perlakuan atau

peninggalan itu sebagaimana yang sepatutnya diambil setelah mengambil kira segala hal keadaan kes itu.

Ladang unggas yang dikecualikan

29. (1) Tertakluk kepada subseksyen (2), Enakmen ini tidak terpakai bagi mana-mana ladang yang ditentukan oleh Pengarah sebagai suatu ladang unggas yang dikecualikan.

(2) Pengarah tidak boleh menentukan mana-mana ladang unggas sebagai dikecualikan di bawah Enakmen ini melainkan jika dia berpuas hati bahawa pengecualian itu perlu untuk melaksanakan apa-apa dasar ekonomi atau sosial kerajaan yang berhubungan dengan usaha untuk mengurangkan atau membasmi kemiskinan di dalam mana-mana bahagian tertentu Negeri.

(3) Walau apa pun subseksyen (1), Pengarah boleh, bagi maksud menjamin kesihatan awam, mencegah kemudaratan harta awam dan mencemaran alam sekitar, mengeluarkan apa-apa arahan yang difikirkannya perlu berhubung dengan pengurusan atau pengendalian ladang unggas yang dikecualikan menurut seksyen ini.

(4) Mana-mana orang yang tidak mematuhi mana-mana arahan Pengarah di bawah subseksyen (3) melakukan suatu kesalahan.

(5) Suatu perakuan yang ditandatangani oleh Pengarah yang memperakukan bahawa sesuatu ladang unggas ialah suatu ladang unggas yang dikecualikan hendaklah menjadi bukti muktamad mengenai hakikat itu.

Pengarah boleh mengkompaun kesalahan

30. (1) Kecuali bagi kesalahan di bawah seksyen 20 dan 21, semua kesalahan lain di bawah Enakmen ini dan peraturan-peraturan boleh dikompaun oleh Pengarah.

(2) Dalam mengkompaun mana-mana kesalahan, Pengarah hendaklah mengarahkan pegawai pelesen untuk membuat tawaran dalam borang yang ditetapkan kepada pesalah untuk mengkompaun

kesalahan tersebut dalam tempoh yang ditentukan oleh Pengarah dalam tawaran itu tertakluk kepada yang berikut:

- (a) tempoh tawaran hendaklah tidak melebihi tiga puluh hari dari tarikh tawaran dikeluarkan; dan
- (b) jumlah kompaun yang ditawarkan hendaklah tidak melebihi dua ribu ringgit tetapi tidak kurang daripada tiga ratus ringgit.

(3) Jika pesalah menerima tawaran untuk mengkompaun itu dalam tempoh yang ditentukan, Pengarah hendaklah mengkompaun kesalahan itu dan selepas itu hendaklah tiada pendakwaan selanjutnya terhadap kesalahan itu boleh dibuat.

(4) Dalam mana-mana kes yang lain, Pengarah hendaklah meneruskan pendakwaan terhadap pesalah.

Pematuhan kepada undang-undang bertulis yang lain

31. Pengeluaran mana-mana lesen di bawah Enakmen ini tidak mengesahkan apa-apa perbuatan atau tindakan yang menghendaki permit, kebenaran atau kelulusan tertentu di bawah mana-mana undang-undang bertulis yang lain dan pemegang lesen tidak dikecualikan daripada mematuhi kehendak-kehendak undang-undang bertulis yang lain itu berkenaan dengan permit, kebenaran atau kelulusan itu.

Perlindungan pegawai awam dan Pihak Berkuasa Negeri

32. Tiada apa-apa liabiliti boleh dikenakan ke atas Pihak Berkuasa Negeri atau mana-mana pegawai awam berkenaan dengan apa-apa perbelanjaan, kerosakan atau siasatan yang berbangkit dalam atau daripada perjalanan sah kuasa yang diberikan atau pelaksanaan sah tugas yang dikenakan di bawah Enakmen ini, dan Pihak Berkuasa Negeri atau mana-mana pegawai itu tidaklah boleh dikenakan apa-apa tindakan, tuntutan atau liabiliti berbangkit dalam atau daripada perjalanan sah kuasa yang diberikan atau pelaksanaan sah tugas yang dikenakan di bawah Enakmen ini.

Pihak Berkuasa Negeri boleh membuat peraturan-peraturan

33. Pihak Berkuasa Negeri boleh membuat peraturan-peraturan bagi melaksanakan peruntukan Enakmen ini dan khususnya tetapi tanpa menjejaskan keluasan apa-apa yang tersebut dahulu dalam peraturan-peraturan itu boleh mengadakan peruntukan bagi atau berkenaan dengan—

- (a) pelesenan dan pendaftaran ladang unggas;
- (b) tatacara, fi, borang dan caj bagi maksud Enakmen ini;
- (c) standard amalan perladangan dan pemprosesan;
- (d) pengkompaunan kesalahan; dan
- (e) perkara-perkara lain yang disifatkan perlu oleh Pihak Berkuasa Negeri bagi maksud Enakmen ini, dan boleh mengadakan peruntukan bahawa apa-apa perbuatan atau peninggalan yang melanggar peraturan-peraturan itu ialah suatu kesalahan.

***Mens rea* tidak diperlukan bagi kesalahan**

34. Dalam mana-mana pendakwaan ke atas sesuatu kesalahan di bawah Enakmen ini, tidaklah perlu untuk membuktikan bahawa perbuatan atau peninggalan yang berkenaan disertai dengan niat, pengetahuan atau kelalaian pada pihak pesalah.

Penyerahan notis, perintah, dokumen, *dsb.*

35. (1) Tiap-tiap notis, perintah atau dokumen yang dikehendaki atau dibenarkan oleh Enakmen ini atau peraturan-peraturan untuk diserahkan kepada mana-mana orang boleh diserahkan—

- (a) dengan menyampaikannya kepada orang yang berkenaan atau kepada anggota keluarganya yang dewasa atau perkhidmat keluarganya;
- (b) dengan meninggalkannya di tempat kediamannya atau tempat perniagaannya yang lazim atau yang terakhir diketahui dalam suatu sampul surat yang dialamatkan kepada orang itu; atau

(c) dengan memajukannya dengan cara pos berdaftar dalam sampul surat yang dialamatkan kepada orang itu di tempat kediamannya atau tempat perniagaannya yang lazim atau terakhir diketahui.

(2) Jika sesuatu notis, perintah atau dokumen dikehendaki atau dibenarkan untuk disampaikan kepada mana-mana orang oleh Enakmen ini atau peraturan-peraturan tidak dapat disampaikan dengan usaha yang munasabah, notis, perintah atau dokumen itu boleh diserahkan kepada orang itu dengan cara menampal notis, perintah atau dokumen itu di mana-mana tempat yang mudah dilihat di premis atau alamat yang terakhir diketahui orang itu dan penyerahan itu hendaklah disifatkan penyerahan yang sempurna bagi maksud Enakmen ini dan peraturan-peraturan.

Peruntukan peralihan

36. (1) Tertakluk kepada subseksyen 6(3), mana-mana orang yang pada masa Enakmen ini mula berkuat kuasa mengusahakan suatu ladang unggas hendaklah, dalam tempoh tiga bulan dari tarikh Enakmen ini mula berkuat kuasa mengemukakan permohonan bagi mendapatkan lesen di bawah Enakmen ini.

(2) Seksyen 7 dan 8 adalah terpakai bagi mana-mana permohonan lesen di bawah seksyen ini.

(3) Mana-mana orang yang disebut dalam subseksyen (1) yang tidak mengemukakan suatu permohonan untuk mendapatkan lesen dalam tempoh yang dikehendaki melakukan suatu kesalahan.

(4) Sebagai tambahan kepada tetapi tanpa menjejaskan seksyen 8, pegawai pelesen boleh menolak suatu permohonan mendapatkan lesen yang dibuat menurut seksyen ini jika ia berpuas hati—

(a) bahawa ladang unggas itu mungkin menyebabkan gangguan melalui pengeluaran bau yang busuk atau debu, pembiakan lalat, serangga atau makluk perosak atau apa-apa faktor lain yang mungkin menjejaskan kesihatan awam atau memudaratkan penduduk tempatan atau harta awam dalam lingkungan dua ratus meter minimum garis

lurus dari bangunan atau struktur ladang yang digunakan untuk perladangan unggas; atau

(b) bahawa kawasan itu telah ditetapkan untuk pembangunan.

(5) Perenggan (4)(a) tidak terpakai bagi mana-mana loji pemprosesan dan penyembelihan.

(6) Jika pegawai pelesen enggan meluluskan mana-mana permohonan di bawah seksyen ini, dia hendaklah menghantar suatu notis kepada pemohon, memberitahu pemohon keengganannya itu dan notis itu hendaklah juga mengarahkan supaya pemohon itu menutup ladang unggas itu dan segala aktiviti yang berkaitan dengannya dalam tempoh enam bulan, atau apa-apa tempoh lain yang dinyatakan dalam notis itu, dari tarikh notis itu.

(7) Seseorang yang kepadanya notis di bawah subseksyen (6) telah dikeluarkan, hendaklah dengan segera memindahkan semua unggas, karkas unggas, sisa unggas dan produk sampingan daging unggas yang terdapat di ladang unggas itu.

(8) Mana-mana orang yang terkilan dengan keputusan pegawai pelesen untuk enggan memberikan lesen menurut permohonan di bawah seksyen ini boleh merayu kepada Pihak Berkuasa Negeri melalui Pengarah dalam tempoh tiga puluh hari dari tarikh penerimaan notis di bawah subseksyen (6), dan keputusan Pihak Berkuasa Negeri adalah muktamad.

(9) Subseksyen 8(5) hendaklah terpakai jika Pihak Berkuasa Negeri membenarkan Rayuan itu.

Pihak Berkuasa Negeri boleh menetapkan syarat

37. Di mana Pihak Berkuasa Negeri membenarkan suatu rayuan di bawah subseksyen 14(6) dan subseksyen 36(8), Pihak Berkuasa Negeri boleh mengenakan syarat tertentu sebagaimana difikirkan perlu.

ENAKMEN PERLADANGAN UNGGAS (NEGERI SELANGOR) 2007

JADUAL PERTAMA

[Subseksyen 7(1) dan 7(2)]

PERMOHONAN LESEN PERLADANGAN UNGGAS DAN
AKTIVITI-AKTIVITI BERKAITAN

(BORANG A)

1. Saya:
(Nama penuh ditulis dengan huruf besar)

Nama Syarikat:

No. K.P.: No. Pendaftaran Syarikat:

Alamat Surat Menyurat:
.....
.....
.....

No. Tel: No. Faks: E-mel:

Bentuk Perniagaan: Milik Tunggal Perkongsian
Syarikat

2. Butir-butir Penternakan:

Jenis Unggas:

Jurusan dan Pedaging Penelur Pembiakan
aktiviti:

Hacri (Penetasan)

Loji Penyembelihan Loji Pemprosesan

3. Butir-butir Ladang:

Lokasi:

Daerah:

Luas Kawasan: (Ha) Kapasiti Ladang:

No. Lot Tanah: Status Tanah:

4. Aktiviti berkaitan:

Jenis pengeluaran:

Keupayaan pengeluaran:

Alamat premis perniagaan:

.....

.....

Tarikh:
Tandatangan pemohon & Cop syarikat

UNTUK KEGUNAAN RASMI PEJABAT

Tarikh permohonan diterima :

Keputusan permohonan: Dilulus Ditolak

Catatan :

.....

.....

Tarikh :
Pegawai Pelesen

ENAKMEN PERLADANGAN UNGGAS (NEGERI SELANGOR) 2007

JADUAL KEDUA

[Subseksyen 7(3)]

FI LESEN

<u>Perkara</u>	<u>Fi (RM)</u> <u>[Setahun]</u>
1. Lesen Menternak	
1.1 Menternak Ayam/Itik	
Kapasiti Ladang	
(a) 500 hingga 5,000 ekor	RM 50
(b) 5,001 hingga 10,000 ekor	RM 100
(c) 10,001 hingga 20,000 ekor	RM 200
(d) 20,001 hingga 25,000 ekor	RM 300
(e) 20,001 hingga 25,000 ekor	RM 400
(f) 25,001 ekor ke atas	RM 500
1.2 Menternak Puyuh/Merpati	
Kapasiti Ladang	
(a) 1,000 hingga 10,000 ekor	RM 50
(b) 10,001 hingga 20,000 ekor	RM 100
(c) 20,001 hingga 30,000 ekor	RM 200
(d) 30,001 hingga 40,000 ekor	RM 300
(e) 40,001 hingga 50,000 ekor	RM 400
(f) 50,001 ekor ke atas	RM 500
2. Lesen Haceri (Pusat Penetasan)	RM 500
3. Lesen Loji Penyembelihan	RM 500
4. Lesen Loji Pemprosesan	RM 500

ENAKMEN PERLADANGAN UNGGAS (NEGERI SELANGOR) 2007


JADUAL KETIGA

[Subseksyen 10(2)]

LESEN UNTUK PERLADANGAN UNGGAS DAN AKTIVITI BERKAITAN

(BORANG B)

TARIKH LUPUT:



Kebenaran adalah diberi kepada:

Nama/Syarikat:
(Pemilik Lesen)

No. Kad Pengenalan/No. Pendaftaran:

Alamat Surat Menyurat:

.....

No. Tel: No. Faks: E-mel:

Untuk:

.....

.....

.....

dengan bilangan ternakan/keupayaan pengeluaran ekor hanya di premis atau kawasan ladang tersebut di atas sahaja.

Lesen ini tidak boleh dipindahmilik.

SYARAT-SYARAT KHAS

.....
.....
.....

Tarikh lesen dikeluarkan:

Lesen sah sehingga:

Bayaran Fi: RM No. Resit:

.....
Pegawai Pelesen

* Permohonan pembaharuan lesen hendaklah dibuat dalam tempoh tidak kurang dari tiga bulan sebelum tarikh luput lesen.

Diluluskan pada 16 Julai 2007
[JPH/BP/Sel. 213; P.U. Sel. Am 0045/1]

SHAMSUL AZRI BIN ABU BAKAR
Setiausaha,
Dewan Undangan Negeri,
Selangor